

M160M: Predigten, Priester Konrad (M1)

3r,1 –[...]
 3r,2 swelich mennische denne nâch deme engele ze dem
 3r,3 [êrsten] in daz wazzer geviel swie siech der was der
 3r,4 [wart] gesunt . vone alleme sîneme siechtuome . dô unser
 3r,5 hêrre vuor mit sînen jungern in dirre werlte dô
 3r,6 [sah] [er] dâ bî dem wîwære krumbe unde halzen unde
 3r,7 vergihtigiu liute unde die die vallenden suhte [hêten] und
 3r,8 ander siechen genuogen . die aber in daz wazzer ze der
 3r,9 rechten zît niht mohten komen . die entbant der heilant
 3r,10 dirre werlte mit sînen gotelichen genâden vone
 3r,11 allen ire unkrefen . dô die juden den wîwære vûrbeten
 3r,12 dô wart daz kriuze vunden . unde wart unser
 3r,13 [hêrre] der heilige Krist . dâr ane genagelet dô geschach
 3r,14 after diu niemer mêre dechein zeichen in dem
 3r,15 [wîwære] . nû sehet die manigen bezeichnunge ane .

3v,1 –[...]
 3v,2 ze sagene noch sô verre ze predigen sô der heilige [Christ]
 3v,3 der dâ ein leben ist himeles unde der erde unde aller
 3v,4 lebentigen mennischen durch uns sîntære
 3v,5 wart gekriuzet . diu heilicheit diu dâr ane [ist]
 3v,6 bediutet die bezeichnunge aller unserre [veter]
 3v,7 swaz si ane ire opfere begiengen . unde ane der satzung
 3v,8 diu in gesetzet was ane den zeichenen der heiligen
 3v,9 wîssagen daz kûndet daz daz alsô geordenet
 3v,10 was . daz seite daz daz alsô ervollet scholte werden
 3v,11 daz der hêren meide sun . sînen lîp gæbe ane [dazz]
 3v,12 kriuze ze marteren durch alle sîntære daz lamp
 3v,13 daz si opfertên ûf deme heiligen altære daz bezeichnenet
 3v,14 die diemüete des almehtigen gotes [dazz]
 3v,15 er semftliclichen . unde stille swîgente [ze] [der]

4r,1 martere gie dô –[...] haben
 4r,2 [obe] er wolte . alse er ze sancto Petro sprach dô er eineme
 4r,3 juden der hiez Malchus daz ôre abe sluoc .
 4r,4 [dô] sprach er ze ime . “stôz dîn swert in dîne scheide
 4r,5 wænes dû des niht wolte ich mînen vater biten
 4r,6 er ne gæbe mir mêre denne zweliv schar der

- 4r,7 heiligen engele . die mit viurînen swerten vüre
 4r,8 mich væhten unde daz vile wole werten daz ich
 4r,9 [in] der juden gewalt . niemer gegeben würde wer
 4r,10 lôste denne die mennischen .” sprach der heilige
 4r,11 Krist “unde wie würde allez daz ervüllet daz vone
 4r,12 mir geschriben ist .” mîne vile lieben si opfereten
 4r,13 in der alten ê rôtiu rinder . daz bezeichnenet daz
 4r,14 rôte bluot daz vone unseres hêrren wunden vlôz wande
 4r,15 wir wâren in einen sô tiefen karkære des leidigen
 4r,16 vâlandes gevallen . hête er uns mit sîner
 4r,17 unzallîchen güete niht erlediget unde en hête mit
 4r,18 sîneme gewalte den gewalt unsers viendes niht
 4r,19 zebrochen sô ne möhten wir niemer volkomen
 4r,20 [sîn] noch semfte ûfvar haben gewonnen . hine zuo
 4r,21 [den] koeren dâ iemer licht ist âne vinster . unde
 4r,22 grôziu kraft âne allen siechtuom . ouwî wie süeziu
 4r,23 spîse uns vone deme kriuze komen ist . wie sælic
 4r,24 [der] lîp ist unde der munt der den hêren lîchnamen
 4r,25 unde daz heilige bluot . des almehtigen gotes
 4r,26 mit riuwen ane sînen jungesten zîten entwæhet
- 4v,1 der –[...] gesmecket daz [uns]
 4v,2 got gewîhet hât . dâ vone die tiefen wunden der
 4v,3 sêle werdent geheilet Eliseus ein heiliger wîssage
 4v,4 der kome êr lange . êr got geboren würde . in eine michel
 4v,5 stat . in eine wîte gegenôte . die liute die dâr [inne]
 4v,6 wâren die klageten ime daz ire wazzer alsô sûr wære
 4v,7 unde alsô hantic daz liute unde vihe dâ vone
 4v,8 sturben unde bâten in daz er in hülfe umbe got [dazz]
 4v,9 in diu ungenâde ze bezzerunge verwandelt würde
 4v,10 dô gie sâ zehant der heilige man Eliseus dâ diu ursprinc
 4v,11 wâren unde warf dâr in salz unde ein wênigez
 4v,12 holz in der bezeichnenunge des heiligen kriuzes
 4v,13 dâ vone wart allez daz wazzer in eine grôze süeze
 4v,14 verwandelt daz iz niemer mêre decheinen . schaden
 4v,15 nieman tet . weder liuten noch vihe . der selben genâden
 4v,16 schulen wir got biten swaz sûres unde bitteres
 4v,17 ane uns sîe vone unsern sünden daz er daz durch
 4v,18 sîn selbes barmunge unde durch sînes heiligen
 4v,19 kriuzes êre verwandele Christus non in memor misericordiae
 4v,20 suae et cetera got hête niht vergezzen sîner barmunge
 4v,21 dô er sîniu liebiu kint under sîne arme vienc unde
 4v,22 under diu vetach sînes schermes ane deme heiligen
 4v,23 kriuze . wande er mit der selben bezeichnenunge
 4v,24 daz joch der verschalknusse unde des leiden vâlandes
 4v,25 vone unserme halse vile gewalticlichen hât geschüttet .
 4v,26 nû rætet iu diu heilige schrift daz ouch –[...]